

اعقل بقى



انت اللي بايع قوتك

بالرخص لعيال الزمن

ليلك قديم

صدى وكسر همتك

خلاك نديم

تايه في بارات الوهن

خوفك لنيم

باعك في سوق من غير تمن

أصلك ضعيف.. عايش أليف

بتلّم فتافيت الرغيف

ساعة المَحَن .. صابك وخم

حلمك يادوب طول القدم

جَوّاك فراغ .. عبّى الدماغ

خَلّاك صنم

تشبه كتير تمثال خشب

محبوس في نيش

حاجة كدا وليها العجب

منفوش بريش

قادر تعيش

بعيدان حطب

اعقل بقى

اصرخ وقولها ع الملاً

اكتبها تنطق ع الورق

أنا جيل جديد

كسّر قيود الكسلانين

بأيدين حديد ...

تشبه لإيد المطرقة

أنا صوت جبين العرقانين

في العتمة يلمع م العرق

...

أنا مش عويل

ولا ضلّ ليل

غاوي الرحيل

ولا كنت طير ضلّ السبيل

يسقط في بير المستحيل

أنا ابن نيل

أنا ابن مية سلسبيل

أنا اللي شبه الأهرامات

مين اللي قال لي خوفو مات

أو عاش ذليل؟!

محبوس في جدران المعابد والمدن

لكن قالوا لي وأكّدوا

إنك وطن ..

انت الطريق ..

وانت الدليل ..

انت الوتد ..

قومي شدي حيلك يا بلد

إيدك في إيد ابن البلد

يحميها رب ...

مين اللي قال انك ضرير؟!
ولا كنت يوم محتاج لطب
أرضك عفيّة مشمّرة، مستنظرة
حبة عرق تسقيها حب
قطّع خيطان العنكبوت
اكسر في جدران التابوت
اصحى بقى ...
من وهم واخذك جّوا حوت
الشمس فوق سطح البيوت
مالية الحوارى شفشقة
بدرت في روح الشغّالين
حبّة شقا.. ودم الحياة
واذا كنت راضي انك تعيش

في الهمّ آه ...

منفوش بريش

كتكوت وساكن شرنقة

سيب الكسل

يدهس في راسك ع الأمل

ينزل في عضمك دقدقة